

2 John

Roube'aten Ana Tur

John ana fef bairou'abin i Babin natunatun bairi isah, ana itinin ekaleisia kikimin nati i ana baremaim bairi hima'am isah. Iti tur an kabumin i ana fefeyan naatu ana baimatnuwen tur, sabuw baifuwenamaim bai'obaiyen kakafih tibi'obaibiyih isan, hina'itin saise matah toniwa'an hinama.

Fef wanawanan tur iti na'atube hi'asgidigid

Merarayow naatu yoyoban (1-3)

Turobe naatu yabow (4-6)

Baibaiyen kakafih ana bai baimatnuwen (7-11)

Yomanin ana merarayow (12-13)

¹Tuwat ain biyanane, Kou'ay Bar kafai wanawananamaim natunatun bairi isah abiyabow men kafaita. Men ayu akisu kwa isa abiyabowamih, baise sabuw iyab tur obe hisoso'ob auman isa tibiyabow. ²Ana yabin tur obe it wanawanatamaim ema'am, naatu boro mar etei bairit tana ma wanatowan. ³Tamat God, naatu Jesu Keriso Tamat Natun, baiwan babanen, kabeber, tufuw hinitit. It nowatamih, tur obe'emaim naatu yabowamaim.

Turobe Naatu Yabow

⁴^aTamat iu'uwit na'atube, natunat Kirisiyan ana efamaim hai yawas hibabatun hima'am ana atit aiti yau sisir gagamin maiyow. ⁵^bImih are au yabow babin, akokok it etei'imak taniyabowbonen. Iti obaiyunen tur i men boubun. Iti obaiyunen tur i marasika anamaim tanowar. ⁶Imih God tanabiyabuw boro fanan tanab ana ofafar tanakaif. Naatu taniyabowbonen tanama. Ana yabin iti obaiyunen tur i marasika anamaim hibinan kwanowar. ⁷^cAna yabin yabowamaim kwanama sabuw

^a 4 3Jn 3 ^b 5 1Jn 2.7 ^c 7 1Jn 4.1-3

baikubibiruwenayah afa Jesu Keriso na orot babin biyah baib isan, men tibibabatun i mounurih na'in hitit tafaram awan kakaratan. Imih orot ta nati na'atube nao men nibibabatun i baikubibiruwenayan, naatu Keriso ana rakit wairafin. ⁸Mata toniwa'an abisa isan tabowabow men kwanabohamih. Baise kwana bukikin kwanabow, saise a baiyan tutufin kwanab. ⁹Orot yait men Keriso ana bai'obaiyenamaim ebi'obaibiyen, i men God bai. Ana yabin i Keriso ana bai'obaiyen nasair rabon me'at. Orot yait Keriso ana bai'obaiyenamaim ema'am i Tamat God Natun hairi buwih. ¹⁰Isan imih orot yait men Keriso ana bai'obaiyen bai enan, abaremaim men ana merar kwanay kwanabaimih. O men tufuw kwanitin. ¹¹Ana yabin orot yait tufuw ebitin, nati orot i ana ofomih matar naatu abisa kakafin esisinaf boro ana ubar turin nab.

Tur Yomanin

¹²Ayu akokok boro tur mounurih na'in atao kwatanowar, baise men akokok fefemaim ana kirum, imih anotanot boro ayu taiyuwu anan aninanawani, yumatau kwana'itin bairi tanao. Saise boro bairit taniyasisir gewas. ¹³God akisin iti tai a yabow babin rubin, i natunatun iti tema'am kwa etei a merar tiyiy.